

1 TIMOSEEWO

Essuula : **1** 2 3 4 5 6

ESSUULA 1

Pawulo, omutume wa Kristo Yesu ng'okulagira kwa Katonda Omulokozi waffe bwe kuli n'okwa Kristo Yesu essuubi lyaffe;

² eri Timoseewo omwana wange ddala olw'okukkiriza: ekisa, okusaasira, nemirembe bibenga gy'oli ebiva eri Katonda Kitaffe ne Kristo Yesu Mukama waffe.

³ Nga bwe nnakubuulirira okubeera mu Efeso, bwe nnali nga njenda e Makedoni, olagirenga abamu obutayigirizanga bulala,

⁴ newakubadde okulowoozanga enfumo n'ebigambo by'obuzaale ebitakoma, ebireeta empaka okusinga obuwaniika bwa Katonda obuli mu kukkiriza; bwe nkola bwe ntyo ne kaakano.

⁵ Naye enkomerero y'ekiragirowe kwagala okuva mu mutima omulongoofu n'omwoyo omulungi n'okukkiriza okutalina bukuusa:

⁶ ebyo abamu babiwunjakamu ne bakyamira mu bigambo ebitaliimu;

⁷ nga baagala okuba ng'abayigiriza b'amateeka, nga tebategeera bye boogera newakubadde bye bakakasa.

⁸ Naye tumanyi ng'amateeka malungi, omuntu bw'agasoma ng'amateeka bwe gali,

⁹ ng'amanyi ekyo nti amateeka tegateekerwawo muntu mutuukirivu, wabula abatali batuukirivu n'abajeemu, abatatya Katonda n'abalina ebibi, abatali batukuvu n'abavvoola Katonda, abatta bakitaabwe ne bannyaabwe, abassi b'abantu,

¹⁰ abenzi, abalya ebisiyaga, abanyazi b'abantu, abalimba, abalayirira obwereere, n'ebirala byonna ebiwakana n'okuyigiriza okw'obulamu;

¹¹ ng'enjiri bw'eri ey'ekitiibwa kya Katonda eyeebazibwa gye nnateresebwa nze.

¹² Mwebaza oyo eyampa amaanyi, ye Kristo Yesu Mukama waffe, kubanga yandowooza nga ndi mwesigwa, bwe yanteeka mu buweereza,

¹³ olubereberye bwe nnali omuvumi era omuyigganya era ow'ekyejo: naye nnasaasirwa kubanga nnakolanga nga ssimanyi mu butakkiriza;

¹⁴ ekisa kya Mukama waffe ne kyeyongerera nnyo wamu n'okukkiriza n'okwagala okuli mu Kristo Yesu.

¹⁵ Ekigambo kyesigwa, era ekisaanira okukkirizibwa kwonna nti Kristo Yesu yajja mu nsi okulokola abalina ebibi; mu bo nze w'olubereberye;

¹⁶ naye kyennava nsaasirwa Yesu Kristo alyoke alabisize mu nze ow'olubereberye okugumiikiriza kwe kwonna, okubeeranga ekyokulabirako eri abo abagenda okumukkiriza olw'obulamu obutaggwaawo.

¹⁷ Era Kabaka ow'emirembe n'emirembe, ataggwaawo, atalabika, Katonda omu,

aweewwenga ettendo n'ekitiibwa emirembe n'emirembe. Amiina.

¹⁸ Ekiragiho kino nkuteresha, mwana wange Timoseewo, ng'ebigambo bya bannabbi bwe byali bye baakwogerako edda, olyoke olwanirenga mu byo olutalo olulungi,

¹⁹ ng'onyweza okukkiriza n'omwoyo omulungi, abalala gwe basindika eri ne bamenyekerwa okukkiriza kwabwe:

²⁰ mu abo ye Kumenayo ne Alegezanda: be nnawa eri Setaani, balyoke bayigirizibwe obutavumanga.

ESSUULA 2

Kale okusooka byonna mbabuulirira okwegayiriranga n'okusabanga n'okutakabananga n'okwebazanga bikolebwenga ku lw'abantu bonna;

² ku lwa bakabaka n'abakulu bonna; tulyoke tubeerenga n'obulamu obutereevu obw'emirembe mu kutya Katonda kwonna ne mu kwegendereza.

³ Ekyo kye kirungi, ekikkirizibwa mu maaso g'Omulozi waffe Katonda,

⁴ ayagala abantu bonna okulokoka, era okutuuka mu kutegeerera ddala amazima.

⁵ Kubanga waliwo Katonda omu, era omutabaganya wa Katonda n'abantu omu, omuntu Kristo Yesu,

⁶ eyeewaayo abe omutango olwa bonna; okutegeera kulibaawo mu ntuuko zaakwo:

⁷ nze kwe nnatekerwa omubuulizi era omutume (njogera mazima, ssirimba), omuyigiriza w'amawanga olw'okukkiriza n'amazima.

⁸ Kyenya njagala abasajja basabanga mu buli kifo, nga bayimusa emikono emitukuvu, awatali busungu na mpaka.

⁹ Bwe batyo n'abakazi beeyonjenga mu byambalo ebisaana, n'okukwatibwa ensonyi n'okwegendereza; si mu kulanganga enviiri, ne zaabu oba luulu oba engoye ez'omuwendo omungi;

¹⁰ naye (nga bwe kisaanira abakazi abeeyita abatya Katonda) n'ebikolwa ebirungi.

¹¹ Omukazi ayigenga mu bukkakkamu mu kugonda kwonna.

¹² Naye omukazi mmugaanyi okuyigirizanga, newakubadde okufuganga omusajja, naye okubeeranga mu bukkakkamu.

¹³ Kubanga Adamu ye yasooka okutondebwa, oluvannyuma Kaawa;

¹⁴ era Adamu si ye yalimbibwa, naye omukazi oli ye yalimbibwa n'aba mu kwonoona:

¹⁵ naye anaalokokanga mu kuzaala, bwe banaanyiikiranga mu kukkiriza n'okwagala n'obutukuvu awamu n'okwegendereza.

ESSUULA 3

Kyesigwa ekigambo ekyo nti Omuntu bw'ayagalanga obulabirizi, yeegomba mulimu mulungi.

² Kale omulabirizi kimugwanira obutabangako kya kunenyezebwa, abeerenga musajja wa mukazi omu, atatamiira, mwegendereza, mukwata mpola, ayaniriza abagenyi, ayigiriza;

³ atayombera ku mwenge, atakuba; naye omuwombeefu, atalwana, ategomba bintu;

⁴ afuga obulungi ennyumba ye ye, agonza abaana be mu kitiibwa kyonna;

⁵ (naye omuntu bw'atamanya kufuga nnyumba ye ye, ayinza atya okujjanjaba ekanisa ya Katonda?)

- ⁶ si oyo eyaakakyuka, alemenga okwekulumbaza n'amala agwa mu musango gwa Setaani.
- ⁷ Era nate kimugwanira okubeeranga n'okutegeezebwa okulungi eri abo ab'ebweru, alemenga okugwa mu kuvumibwa ne mu kyambika kya Setaani.
- ⁸ Bwe batyo n'abaweereza kibagwanira okubeeranga abalimu ekitiibwa, si bannimibbirye, abatanywanga mwenge mungi, si beegombi ba bintu;
- ⁹ nga bakuuma ekyama eky'okukkiriza mu mwoyo omulungi.
- ¹⁰ Era nate abo basookenga okukemebwa, balyoke baweereze, nga tebaliiko kya kunenyezebwa.
- ¹¹ Bwe batyo n'abakazi kibagwanira okubeeranga abalimu ekitiibwa, abatawaayiriza, abatatamiira, abeesigwa mu byonna.
- ¹² Abaweereza babeerenga basajja ba mukazi omu, nga bafuga abaana baabwe obulungi n'ennyumba zaabwe bo.
- ¹³ Kubanga abamala okuweereza obulungi beefunira obukulu obulungi n'obugumu bungi mu kukkiriza okuli mu Kristo Yesu.
- ¹⁴ Nkuwandiikidde ebyo nga nsuubira okujja gy'oli mangu;
- ¹⁵ naye bwe ndwanga olyoke obe ng'omanyi bwe kigwana okukolanga mu nnyumba ya Katonda, ye kkanisa ya Katonda omulamu, empagi n'omusingi eby'amazima.
- ¹⁶ Era awatali kubuusabuusa ekyama eky'okutya Katonda kye kikulu; oyo eyalabisibwa mu mubiri, n'aweewwa obutuukirivu mu mwoyo, n'alabibwa bamalayika, n'abuulirwa mu mawanga, n'akkirizibwa mu nsi, n'atwalibwa mu kitiibwa.

ESSUULA 4

- N**aye Omwoyo ayogera lwatu nti mu nnaku ez'oluvannyuma walibaawo abaliva mu kukkiriza, nga bawulira emyoyo egikyamyanya n'okuyigiriza kwa basetaani,
- ² olw'obunnanfuusi bw'abalimba, nga bookebwa emyoyo gyabwe nga n'ekyuma ekyokya,
- ³ nga bawera okufumbiriganwanga era nga balagira okulekanga ebiriibwa, Katonda bye yatonda biriirwanga mu kwebaza abakkiriza ne bategeerera ddala amazima.
- ⁴ Kubanga buli kitonde kya Katonda kirungi, so siwali kya kusuula bwe kitoolebwa n'okwebaza:
- ⁵ kubanga kitukuzibwa na kigambo kya Katonda n'okusaba.
- ⁶ Bw'onojjukizanga ab'oluganda ebyo, onoobaaga muweereza mulungi owa Kristo Yesu, ng'okulira mu bigambo eby'okukkiriza n'eby'okuyigiriza okulungi kwe wagoberera:
- ⁷ naye enfumo ezitali za ddiini ez'obusirusiru z'oba olekanga. Weemanyiiizenga okutya Katonda:
- ⁸ kubanga okwemanyiiiza kw'omubiri kugasa akaseera katono; naye okutya Katonda kugasa mu byonna, kubanga kulina okusuubiza kw'obulamu obwa kaakano n'obw'obugenda okujja.
- ⁹ Ekigambo ekyo kyesigwa era ekisaanira okukkirizibwa kwonna.
- ¹⁰ Kubanga kyetuva tategana ne tufuba, kubanga twasuubira Katonda omulamu, Omulokozi w'abantu bonna, okusinga w'abakkiriza,
- ¹¹ Lagiranga ebyo obiyigirizenga,
- ¹² Omuntu yenna takunyoomanga lwa buvubuka bwo; naye beeranga kya kulabirako eri abo abakkiriza mu kwogeranga, mu kutambulanga: mu kwagalanga, mu kukkirizanga, mu kubanga omulongoofu.

- ¹³ Okutuusa lwe ndijja, nyiikiranga mu kusoma, n'okubuuliriranga, n'okuyigirizanga.
- ¹⁴ Tolekanga kirabo ekiri mu ggwe, kye waweebwa olw'obunnabbi awamu n'okuteekebwako emikono gy'abakadde.
- ¹⁵ Ebyo obirowoozenga, obeerenga mu ebyo; okuyitirira kwo kulabikenga eri bonna.
- ¹⁶ Weekuumenga wekka n'okuyigiriza kwo. Nyiikiriranga mu ebyo; kubanga bw'okola bw'otyo, olyerokola wekka era n'abo abakuwulira.

ESSUULA 5

Tonenyanga mukadde, naye omubuuliriranga nga kitaawo abavubuka ng'ab'oluganda:

- ² abakazi abakadde nga nnyoko; abato nga bannyoko mu bulongoofu bwonna.
- ³ Obawenga ekitiibwa bannamwandu ababa bannamwandu ddala.
- ⁴ Naye nnamwandu yenna bw'aba n'abaana oba bazzukulu basookenga okuyiga okwegendereza eri ab'omu nnyumba zaabwe, n'okusasula bakadde baabwe: kubanga ekyo kye kikkirizibwa mu maaso ga Katonda.
- ⁵ Naye abeera nnamwandu ddala n'alekebwa yekka, asuubira Katonda, n'anyiikiranga okusaba n'okwegayiriranga emisana n'ekiro.
- ⁶ Naye oyo awoomerwa ebinyumu ng'afudde newakubadde ng'akyali mulamu.
- ⁷ Era n'ebyo obalagire, balemenga okubaako eky'okunenyezebwa.
- ⁸ Naye omuntu yenna bw'atajjanjaba babe n'okusinga ab'omu nnyumba ye nga yeegaanyi okukkiriza, era nga ye mubi okusinga atakkiriza.
- ⁹ Nnamwandu yenna tawandiikibwanga nga tannatuusa myaka nkaaga, eyafumbirwa omusajja omu
- ¹⁰ asiimibwa mu bikolwa ebirungi oba nga yaleranga abaana, oba nga yayanirizanga abagenyi, oba nga yanaazanga abatukuvu ebigere, oba nga yabeeranga ababonaabona, oba nga yagobereranga nnyo buli kicolwa ekirungi.
- ¹¹ Naye bannamwandu abakyali abato obagaanenga: kubanga bwe balikabawala eri Kristo, nga baagala okufumbirwa;
- ¹² nga bazza omusango kubanga basuula okukkiriza kwabwe okw'olubereberye.
- ¹³ Era ate bayiga okubeeranga abagayaavu, nga batambulatatambula okubuna amayumba naye tebagayaala bugayaazi, naye balina olugambo n'akajanja nga boogera ebitasaana.
- ¹⁴ Kyenya njagala abakyali abato bafumbirwanga, bazaalenga abaana, bafugenga ennyumba, balemenga okuwa omulabe ebbanga w'ayima okuvuma:
- ¹⁵ kubanga waliwo kaakano abaakyuka okugoberera Setaani.
- ¹⁶ Omukazi yenna akkiriza bw'abanga ne bannamwandu, abayambenga, era ekkansa eremenga okuzitoowererwa, eryoke eyambenga bannamwandu ddala ddala.
- ¹⁷ Abakadde abafuga obulungi basaanyizibwe okuweebwanga ekitiibwa emirundi ebiri, okusinga abafuba mu kigambo n'okuyigiriza.
- ¹⁸ Kubanga ekyawandiikibwa kyogera nti Tosibanga mumwa gwa nte ewuula enjaano. Era nti Akola emirimu asaanira empeeri ye.
- ¹⁹ Tokkirizanga kiroope ku mukadde awatali bajulirwa babiri oba basatu.
- ²⁰ Aboonoona obanenyezanga mu maaso g'abantu bonna, era n'abalala balyoke batyenga.
- ²¹ Nkukuutirira mu maaso ga Katonda, ne Kristo Yesu, ne bamalayika abalonde, weekuumenga ebyo awatali kusaliriza, nga tokola kigambo olw'obuganzi.

- ²² Toyanguyirizanga kussaako mikono ku muntu yenna, so tossanga kimu na bibi by'abantu abalala: weekuume obeerenga mulongoofu.
- ²³ Tonywanga mazzi gokka, naye onywanga ne ku mwenge katono olw'olubuto lwo n'olw'okulwalalwala.
- ²⁴ Waliwo abantu ebibi byabwe biba mu lwatu; nga bibakulemba okugenda mu musango; era n'abalala bibavaako nnyuma.
- ²⁵ Era bwe kityo n'ebikolwa ebirungi biba mu lwatu; ne bwe kitaba bwe kityo tebirirema kwolesebwa.

ESSUULA 6

- A**bali mu bufuge abaddu balwoozenga bakama baabwe bennyini nga basaanidde ekitiibwa kyonna, erinnya lya Katonda n'okuyigiriza kwaffe biremenga okuvumibwa.
- ² Era abalina bakama baabwe abakiriza tebabanyoomanga, kubanga ba luganda; naye beeyongere okubaweerezanga, kubanga abassa ekimu mu kukolwa obulungi bakiriza era baagalwa. Yigirizanga ebyo obibuulirirenga.
- ³ Omuntu yenna bw'ayigirizanga obulala, so nga takiriza bigambo bya bulamu, bye bya Mukama waffe Yesu Kristo, n'okuyigiriza okugobereranga okutya Katonda;
- ⁴ nga yeekulumbaza, nga taliiko ky'ategeera, wabula okukalambiza obukalambiza empaka n'entalo ez'ebigambo, omuva obuggya, okuyomba, okuvuma, okuteerera obubi,
- ⁵ okukaayana kw'abantu abayonooneka amagezi, abaggibwako amazima, nga balwoozanga ng'okutya Katonda kwe kufuna amagoba.
- ⁶ Naye okutya Katonda wamu n'obutayaayaananga ge magoba amangi:
- ⁷ kubanga tetwaleeta kintu mu nsi, kubanga era tetuyinza kuggyamu kintu;
- ⁸ naye bwe tuba n'emmere n'ebyokwambala, ebyo binaatumalanga.
- ⁹ Naye abaagala okugaggawala bagwa mu kukemebwa ne mu mutego n'okwegomba okungi okw'obusirusiru okwonoona, okunnya abantu mu kubula n'okuzikirira.
- ¹⁰ Kubanga okwagala ebintu kye kikolo ky'ebibi byonna: waliwo abantu abayaayaanira ebyo, ne bakyamizibwa okuva mu kukkiriza, ne beefumitira ddala n'ennaku ennyingi.
- ¹¹ Naye ggwe, omuntu wa Katonda, ddukanga ebyo, ogobereranga obutuukirivu, okutya Katonda, okukkiriza, okwagala, okugumiikiriza, obuwombeefu.
- ¹² Lwananga okulwana okulungi okw'okukkiriza, nywezanga obulamu obutaggwaawo, bwe wayitirwa, n'oyatula okwatula okulungi mu maaso g'abajulirwa abangi.
- ¹³ Nkukuutirira mu maaso ga Katonda, awa byonna obulamu, ne Kristo Yesu eyateggeeza okwatula okulungi eri Pontio Piraato;
- ¹⁴ weekuumenga ekiragiro awatali bbala, awatali kya kunenyezebwa, okutuusa ku kulabika kwa Mukama waffe Yesu Kristo:
- ¹⁵ kw'aliraga mu ntuuko zaakwo Nannyini buyinza yekka atenderezebwa, Kabaka wa bakabaka, era Mukama w'abaami;
- ¹⁶ alina obutafa yekka, atuula mu kutangaala okutasemberekeka; omuntu yenna gw'atalabangako, so siwali ayinza okumulaba: aweebwenga ekitiibwa n'obuyinza obutaggwaawo. Amiina.
- ¹⁷ Okuutirenga abagagga ab'omu mirembe gya kaakano obuteegulumizanga, newakubadde okwesiga obugagga obutali bwa lubeerera, wabula Katonda, atuwa byonna olw'obugagga tulyoke twesanyusenga n'ebyo;
- ¹⁸ bakolenga obulungi, babeerenga abagagga mu bikolwa ebirungi, babeerenga bagabi,

bassenga kimu;

¹⁹ nga beeterekera eky'okuyimako ekirungi olw'ebiro ebigenda okujja, balyoke banywezenga obulamu ddala ddala.

²⁰ Ai Timoseewo, kuumanga kye wateresebwa, nga weewala ebigambo ebitaliimu ebitali bya Katonda n'okulwana kw'ebigambo eby'okutegeera, okuyitibwa bwe kutyo mu bulimba;

²¹ waliwo abantu abeegomba okuba nakwo, ne bakyama mu kukkiriza. Ekisa kibeerenga nammwe.

For other languages please go to **www.wordproject.org**